



Urs Cadruvi (san.) e Remo Caminada han preschentà la nova cumparsa da la LR en ina discussiun moderada d'Andreas Gabriel.

FOTO R. G. DERMONT

Metter la participaziun en il center

Lia Rumantscha: La nova pagina d'internet integrescha ils utilisaders

DA REST GIACUN DERMONT / ANR

■ **La Lia Rumantscha ha realisà per 60'000 francs ina nova cumparsa. La pagina d'internet gist creada duai promover il barat tranter ils Rumantschs e la Lia.** «Cun sia nova pagina d'internet envida la Lia l'utilisader a sa participar a la creaziun da tala cun dar agens impuls», ha declarà Urs Cadruvi, il secretari general da la Lia Rumantscha a chaschun d'ina orientaziun da pressa gievgia avantmezdi. Tant la preschentscha en l'internet sco er il nov logo èn vegnids creads dal designader Remo Caminada da Sagogn. En ina discussiun moderada d'Andreas Gabriel han Cadruvi e Caminada preschentà la nova cumparsa da la Lia. «La pagina da la LR duai daventar in plattafurma interactiva per ils Rumantschs e tuttina mantegnair sia funcziun oriunda d'infurmar personas interessadas d'auters linguatgs», ha declarà Remo Caminada. La nova pagina d'internet da la Lia è er accessibla per tudestg, talian, franzos ed englais. La part interactiva da la pagina creada completamain da nov cumpeggia cunzunt la part dal chalender d'occurrènz. Sper sias atgnas occurrènz publitgescha la Lia Rumantscha er talas da personas u instituziuns externas. Questa novaziun por-

scha als Rumantschs la pussaivladad d'interagir tranter dad els e vers anora.

Ina plattafurma da barat per ils Rumantschs

La nova pagina d'internet da la LR regorda sin l'emprima egliada ad ina maisa vida, che s'emplenescha pli e pli cun sa cliccar tras ils differents registers. «L'instituziun sa maschaida uschea cun la realitad. La pagina è dinamica e sa sviluppa adina enavant, ella e viva e selvadia», ha relatà Remo Caminada. La nova preschentscha d'internet da la Lia è tecnicamain innovativa e s'adatta mintgamai a l'apparat, cun il qual l'utilisader visita la pagina, sajan quai computers u telefons mobils. La Lia Rumantscha vul, era cun sia nova plattafurma en l'internet, animar ils Rumantschs da s'engaschar per lur lingua e lur cultura. Sia finamira primara resta il mantegniment dal rumantsch per generaziuns che vegnan. Gronda paisa dat la LR cunzunt a la scola rumantscha. Oravant tut en vischnancas che fusiuneschan vegn il rumantsch sco lingua da scola spert sut squitsch. La Lia Rumantscha cusseglia las vischnancas en connex cun l'elavuraziun da la lescha da linguas e la lescha da scola e las sustegna cun l'applicaziun dal rumantsch sco lingua uffiziala e lingua da

scola. Da nov vul la LR er s'occupar pli ferm dals Rumantschs che n'abitan betg en il territori rumantsch, mabain en l'uschenunada diaspora.

In nov logo per la Lia Rumantscha

Il nov logo da la LR consista da trais circuls che sa cruschen e furman quattras ina part communabla. Tenor il creatur da quest nov logo, Remo Caminada, è il nov logo «ina conseguenza logica da la midada da la filosofia da la Lia». Las rudellas stattan simbolicamain per la diverssiun da las opiniuns entaifer ils Rumantschs che sa chattan entamez ad in consens. Urs Cadruvi declarà: «La lavur da la Lia n'è betg da spindrar il rumantsch, mabain da porscher las premissas, la plattafurma per ch'ils Rumantschs possian far quai sez». L'enconuschenta clav rumantscha, il simbol per l'access dals Rumantschs ad autras linguas latinas, n'è dentant betg vegnida abolida dal tut. Ella è vegnida simplifitgada ed ultra da quai ha ella retschavì sco accompagnadra la frasa: «per nossa lingua». Sin la nova pagina d'internet da la Lia cumpara ella en il chantun giudim a dretg e circumdescha uschia quasi ensemen cun il nov logo che sa chatta sisum a sanester il cuntegn individual da la pagina d'internet da la Lia Rumantscha.